

quoque sum ejus Ducis, quem cæsum in acie lugemus, et cujus necem indigna crudelitate vindicare vultis: mihi quoque debetur iste captivus, hunc mihi vindico, et mei juris esse pugno: si quis illum aliter ac volo, attingat, ultorem me habebit. Attonitus hac oratione cœtus obmutuit: neque quisquam aufus est durius quidquam in captivum statuere.

Sic auctoritate sua vir egregius ad miserorum salutem utitur: Eandem strenue adhibet ad tuendam religionem, cujus tanto studio flagrat, ut Regem Galliæ hoc nomine plurimi faciat, quod eum [catholicæ et] avitæ religionis eximium esse vindicem audiverit. In Lauretano autem pago strenuam sacerdoti Missionis præsidi operam navat. Quidquid edixit Pater, quidquid utile communiter fore censet, huic mandat, et curandum [atque efficiendum] certo confidit. Ego vero nullus dubito quin orationis peculiari dono fruatur, ac Deum præ oculis semper habeat: sanctissimum quidem JESU. nomen in ore semper habet ac licet tacitus illud pronunciet, facere tamen non potest, quin a prætereuntibus audiatur. En quas fruges hoc solum Canadicum efferat! Lætiores multo essent atque uberiores, si triplex lolium abesset, quod, Gratia Deo, prorsus ex hoc Lauretano agro extirpatum est, ebrietatem dico, superstitionem, et impudicitiam. Hæc triplex Missionum nostrarum labes quarum ebrietas prima et omnium maximè capitalis est. Hæc Missionem pulcherrimam, cui à Saltu nomen factum, profligavit: hæc reliquas evertet,